

ԽՄԲԲԴՐՈՒԹԵԱՆ ԿՈՂՄԻՑ

Լազարեան ճեմարանի մասնագիտական դասարանների Խորհուրդը 1910 նոյեմբերի 5-ին Հ. Աճառեանի Գաւառական Բառարանը ճանաչեց արժանի Դ. Քանանեանի մրցանակին:

Խոյն Խորհրդի որոշման համեմատ, որ տեղի ունեցաւ 1912 նոյեմբերի 7-ին, յիշեալ բառարանն այժմ լոյս է տեսնում էմինեան Ազգագրական Ժողովածուի մէջ իրբե նորա թ. հատորը:

Այն տեսութիւններն ու սկզբունքները, որոնք առաջնորդ են հանդիսացել Գաւառական Բառարանիս կազմութեան ժամանակ, հեղինակը պարզել է իւր յառաջարանի մէջ, որից կարող է տեղեկանալ և հայ ընթերցողը:

Իրբե իւր տեսակի մէջ առաջին օրինակ՝ Հ. Աճառեանի Գաւառական Բառարանն այժմ մատչելի է դառնում գրական և գիտական ընդարձակ շրջանների ուսումնափութեանը. Հայ բառարանների կարգի մէջ ներկայ գաւառական բառարանը մի կողմից լրացնում է նոցա թերին և միւս կողմից կարծես նոցա շարայարութիւնն է դառնում. Սակայն այդ բառարանի նշանակութիւնն առաւել մեծ է հայ ազգագրութեան նկատմամբ. նորա մէջ ամփոփուած են թանգագին տեղեկութիւններ և ցուցումներ հայ ժողովրդի, սովորոյթների, խաղերի, հաւատալիքների, ընտանեկան և հասարակական կենցաղի և այլ այսպիսի հանգամանքների մասին և որ գլխաւորն է, նա տալիս է հարուստ պաշար հայկական բարբառագիտութեան, որը մեծ նշանակութիւն ունի Հայոց լեզուի ամբողջ նկարագիրն ըմբռնելու համար. Չնայելով այս առաւելութիւններին, Հ. Աճառեանի Գաւառական Բառարանը՝ իրբե բառերի և գարձուածների հաւաքածու՝ լիակատար չէ. Այդ երեսում է ներկայ տարուայ յունուար ամսին Մայր Աթոռի տպարանում լոյս տեսած այն աշխատութիւնից, որ կազմել է Սահակ վարդապետ Ամատունի «Հայոց բառ և բան» վերնագրով. Երկու աշխատութիւնների մէջ պարունակուած նիւթերի համեմատութիւնը բերում է այն եղբակացութեան, որ նոքա, իրարու ուղղելով և իրարու լրացնելով, կարող են նոր յայտնութիւնների առիթ լինել և միւնոյն ժամանակ նպաստել հայերէն լեզուի աւելի ընդարձակ ծանօթութեան:

Էմինեան Ազգագրական Ժողովածուի սոյն թ. հատորն՝ ի լոյս ընծայելով, խմբագրութիւնս մեծ յոյս է տածում, որ Գաւառական Բառարանս կ'արժանանայ իւր պատշաճաւոր գնահատմանն և միա-

ժամանակ դիւրութիւններ կ'ընծայէ Հայոց ներքին կեանքի բաղդատական ուսումնասիրութեան և ճշգրիտ լուսաբանութեան գործին.

Ընթերցողին թողնելով անմիջական ծանօթութեան միջոցով իւր եզրակացութիւնները հանելու սոյն հրատարակութեան մասին, խմբագրութիւնս, օգուտ քաղելով ներկայ առիթից, իւր պարտականութիւնն է համարում, վերջապէս, երախտավիտութեան հարկը տալ 1912 փետրուարի 8-ին վախճանած ուսուցչապետ Գ. Ա. Խալաթեանցի յիշատակին, որ իւր կեանքի վերջին տասնամեկում այն է, 1901-ից մինչև 1910 թուականն, էմինեան Ազգագրական ժողովածուի խմբագրութեան և հրատարակութեան ղեկավարն եղաւ. Նորա խմբագրութեամբ լոյս տեսան նոյն ժողովածուի բոլոր ութն հատորները, որոնք այսօր գիտութեան թանգագին ժառանգութիւնն են. Լազարեան ճեմարանի մասնագիտական դասարաններում հայկաբանութեան ուսուցչապետի ամբիոնը գրաւած լինելով, հանգուցեալ Դրիգոր Աբրահամեան Խալաթեանց, 1881 թուից սկսած, երբ լոյս տեսաւ նորա առաջին յօդուածը «Սասունցի Դաւթիթ*» մինչև 1910, երբ հրատարակուեցաւ նորա վերջին երկը «Ուրուագիծ Հին Հայաստանի Պատմութեան» ** երեսուն տարի շարունակ անխոնջ աշխատանք կրեց Արևելագիտութեան ասպարիզում: Դիտութեան համար թանգագին նպաստներ են ինչպէս նորա հրատարակած հին յիշատակարանները, որոնց մէջ առանձնապէս նշանակելի են Լազարեան ճեմարանի 887 թուին գրուած գրչագիր աւետարանի լուսատիպ հրատարակութիւնն, և Մնացորդաց գիրքը, նմանապէս և նորա քննական յօդուածներն ու հետազօտութիւնները, որոնց մէջ առանձին հետաքրքրութիւն են շարժում «Հայկական Վէպը Մովսէս Խորենացու պատմութեան մէջ» (Մոսկով 1896) և «Հայ Արշակունիք Մովսէս Խորենացու պատմութեան մէջ» (Մոսկով 1903) աշխատութիւնները: Ցաւալի է, որ մահը խզեց նորա կեանքի թելը, որ դեռ լի էր կարողութեամբ, և գիտութիւնը զրկուեցաւ մի վաստակաւորից, որ քաջ ճանաչում էր իւր պարտականութիւնը:

Խմբագրութիւնս, լիպէս գնահատելով հանգուցեալ ուսուցչապետի, Դրիգոր Աբրահամեան Խալաթեանցի, երախտիքը, էմինեան Ազգագրական ժողովածուի սոյն Թ. հատորն, իբրև առաջին հրատարակութիւնը նորա մահից յետոյ, ձօնում է նորա անուանը: Թհղ յաւէրժ անմոռանալի մնայ նորա յիշատակը:

Կ. Կ.

Յ Սեպ. 1913 Մոսկով
Լազարեան Ճեմարան.

* ա. Ժ. Ա. Ա. Օկտաբր.

** ա. Տրուց ու Վոստոկովնու, XXX.